

四庫全書

集部

欽定四庫全書

集部
明詩綜卷七十一

詳校官中書_臣涂日煥

主事銜_臣徐以坤覆勘

總校官降調編修_臣倉聖脉

校對官庶吉士_臣潘曾起

謄錄監生_臣楊恪

欽定四庫全書

明詩綜卷七十一

翰林院檢討朱彝尊編

文震孟

二首

震孟字文起長洲人天啓壬戌賜進士第一授翰林修撰以言事鐫級崇禎初復原官歷中允諭德掌司經局右春坊進少詹事以禮部左侍郎兼東閣大學士卒謚文肅有葑園詩稿

陳皇士云

文公詩不多作然
不失臺閣氣象

靜志居詩話文氏自温州守以來累葉風流儒
雅為士林所推相國晚達早歸宗禎五十輔臣
骨鯁稱首烏衣子姓名節相繼不媿清門是難
能也詩頗平緝擬古一章纏絲婉約庶幾屈宋
唐景之
遺音乎

擬古遠行

江之陽兮有嶼江之陰兮有渚朝而風兮夕而雨望夫
君兮渺何許春波兮悠悠日暮兮夷猶擘青桂兮為櫂
寒木蘭兮為舟恍含思兮凝睇乘清風兮遠游遠游兮

上下載行兮載舍遵中流兮待君將寄心於遠者

蔣德璟 一首

德璟字若柳晉江人天啓壬戌進士改庶吉士
授編修歷侍講諭德廢子掌司經局累官太子
少保禮部尚書文淵閣大學士有敬日草

至廣州聞黎棲志喜

重開幕府試琱戈七哨功成獻凱歌借問凌烟誰第一
漢家劒履賜蕭何

方逢年 一首

逢年字書田遂安人天啓壬戌進士改庶吉士
除編修累官禮部尚書東閣大學士有雪滌
齋集

越來溪

層臺築五年高見三百里如何越兵來不知渡溪水

馮元颺 一首

元颺字爾發慈溪人天啓壬戌進士知澄海揭

陽二縣入為戶科給事中歷官兵部尚書

首善書院感舊作

維貞皇帝神授符詔出明光徵大儒有臣元標首應詔
誰並進者臣從吾一時諸儒相繼入王道蕩蕩民所趨
貞皇雖逝嗣王少曆之日出時未晡諸儒可謂睹上治
力崇正學開榛蕪請為天子建書院揭以首善天之衢
漢唐宋代何足數升堂入室泗與洙當使亂臣賊子懼
如陸有軌水有桴豈無儼鼎相錯列能由是路亦吾徒

越歲壬戌策進士臣鼐蒙與諸臣俱二十為學志方壯
晨起盥漱遵修塗少焉諸儒次第入鳴鐘擊鼓聲鏗于
衣冠肅對寂未語森若披古賢聖圖儒者寧盡濶世務
憂天往往多訐謨乃知名教自足樂照耀萬古焉可誣
彼譖人者亦太甚曰宋之敗由程朱封疆在今多事日
衰衣博帶何其迂輔臣向高為此懼手自伏疏陳青蒲
誰為此言告陛下當付之吏法當誅天子寬仁置勿問
忍見白日舞妖狐嗚呼諸儒死不恨宣尼粟主誠何辜

乙丙之際不可說故老欲哭徒嗟吁丁卯八月聖人出
讒者慄慄憂頭顱臣飈再入問書院門外細草翔啼烏
聖人豈不重經術時危未暇陳蒼珙竊見京師富梵室
口語以咀拜以膜亦有高閣祀天主譚兵治厯喧齟壺
獨使書院屏勿事臣飈敢復惜微軀卿雲縵縵天子都
諸儒靈爽應未徂大道經天終有孚幸甚為念臣區區

孫耳伯云京師首善之地琳宮梵宇鴟吻相望獨無學
者敬業樂羣之地往時羅文恭徐文貞講學率借僧舍
誠大闕事也天啓二年御史臺諸公構書院一所於宣
武門內東墻下南皋少墟兩先生朝退公餘不通賓客

不赴宴會輒入書院講學一時士風為之少變未幾逆璫用事郭允厚朱童蒙輩相繼論劾以講學為門戶及楊忠烈劾魏忠賢疏上黨禍大作善類一空而御史倪文煥遂奏請毀書院棄先師木主于路左左壁有記為葉公向高文董公其昌書並碎焉書院既毀逆祠乃建矣

詩話萬曆二十九年二月庚午朔天津河御用監少馬監堂進大西洋利瑪竇所貢土物時先太傅文恪公掌禮部尚書事疏言會典止有西洋瑣里國而無大西洋其真偽不可知又寄往二十年方行進貢與遠方慕義獻琛者不同且所貢天主天主母圖既屬不經而行李中有神仙骨夫既稱神仙自能翀舉安得遺骨此韓愈所云凶穢之餘不宜令入宮禁者也乞速勒歸國勿許潛居兩京與內監交往以致別生支節眩惑愚民疏進不報後其徒湯若望以其國中

厯法徵大統之差徐宮保光啓篤信之會大時
雍坊所建首善書院鄒忠介馮恭定講學之所
董其役者周忠毅宗建呂工部克孝時先大父
楚雄知府以任子除都察院照磨竹頭木屑實
司其勞書院成葉文忠撰記董文敏書之先大
父業遷官故未書名于石也兩公講學事在天
啓二年既而御史倪文煥等詆為偽學疏略曰
聚不三不四之人說不痛不癢之話作不深不
淺之揖噉不冷不熱之餅是年碎其碑暴之門
外毀先聖粟主焚經籍於堂中崇禎初文煥伏
法院僅存宮保率若望等借院修厯署曰厯局
久之西洋人踞其中更為天主堂至今不改矣
馮公是詩
母忝詩史

倪嘉善 一首

嘉善字迪之桐城人天啓壬戌進士改庶吉士授檢討遷司業歷中允諭德有媚筆泉集

詩話崇禎己巳帝幸太學賜倪公坐講周易泰卦又嘗侍經筵講論語益者三友帝問孰為益孰為損對曰天子尚友在法堯舜而已帝為改容公太僕卿贈工部侍郎應眷之子太僕天啓中請留楊左尋削籍者也

九日

牢落家居久頻逢令節過秋聲聞鴈少霜意入林多幽思驚時換山游奈雨何羣生高卧穩黃菊許誰歌

張有譽一首

有譽字誰譽江陰人中萬厯己未會試天啓壬戌賜進士出身除南京戶部主事累官戶部尚書加太子太保晚為僧居蘇州之靈巖

俞無殊移居光福山同顧茂倫樵水訪之不值留贈

一逕逶迤入升階眼膜開當窓羅洞壑平地儼樓臺山翠侵簷落花香拂案來扁舟同訪戴興盡尚徘徊

倪嘉慶 二首

嘉慶字篤之江寧人天啓壬戌進士除戶部主事歷戶科給事中晚為僧名函潛又更名大然有靈潭集

詩話倪公治賦之才崇禎戊辰在樞部上言國計入不敷出歲額缺至二百三十餘萬何以支持其言瞭若指掌假令思陵此時聽公之言綢繆區畫則後此雖有水旱寇賊尚可緩於危亡而惜乎不見納也既而兵科給事中劉徽疏請裁驛遞有旨裁十之三省郵傳銀六十萬公獨昌言曰驛遞之說貧民不能自食者賴之裁之太過將鉅而走險此盜生之源也俄而李自成

果以驛卒被裁走入高迎祥隊中後
遂以亡明朝野咸服公計慮之遠云

獄中九日寄友人

禁柝方嚴晝掩扉登高作賦苦相違更無叢菊開籬落
只有飛霜上客衣九月吟蟲猶夜泣五年征鴈失南歸
山頭廷尉遙相望緊緊黃囊送夕暉

驟雨

雨驟泉聲急雲涼樹色濃不知何處寺忽送一聲鐘

王錫衮 二首

錫袞字龍藻雲南石衛人天啓壬戌進士改庶
吉士授檢討歷侍講南國子司業諭德庶子祭
酒以吏部左侍郎兼翰林學士

聖駕臨雍恭紀 二首

乍挹方諸水來湘泮水芹金樞澹華月玉露展蕭辰俎
豆三千士都俞十九人公庭看萬舞未許羽衣陳
樸學臯謨古昌言聖主聆硬黃摹獵碣淡墨捧名經曹
子齊歡洽真儒足典型自今隆祀典長照簡編青

詩話崇禎十四年八月太學當釋奠思陵有詔再臨辟雍於是罷遣閣臣及分獻官時龍虎山真人張應京適在都疏請入監觀禮尚書蔣公德璟暨王公咸持不可駁回十七日王公奉遣祭夕月壇二鼓始詣國子監十八日卯初刻駕自長安左門出由崇文街至成賢街入廟門兩公導帝升階坐御幄內官持金餅金甌金爐者六人天漸明行釋奠禮畢幸彝倫堂祭酒南居仁講書臯陶謨自天敘有典至敬哉有土司業羅大任講易咸卦尋命賜茶文班自行聖公及閣部共一十九人武班三十八人分東西坐帝命禮閣臣將進士題名碑并石鼓悉摹拓進呈又諭閣臣周程張邵朱六子不當槩置先儒之列乃定議改稱先賢云是舉也蔣公紀之特詳今節錄以證王公之作

文安之一首

安之字汝止夷陵人天啓壬戌進士改庶吉士
授檢討遷南國子司業歷中允諭德詹事有鐵
菴藁

山居漫興

一江烟雨理漁蓑
筍笠長拋首自科
薄醉久無中使促
夜歸須憚灞陵訶
雲連西塞迴青嶂
樹繞東流旋綠渦
為傍赤磯依舊隱
月明堅坐扣舷歌

齊心孝

一首

心孝字君求桐城人天啓壬戌進士改庶吉士

授編修

詩話太史賦詩無多與女郎沙蘭英章文玉
定情一物相貽拳拳叩叩宜其為情死也

答女郎沙蘭英貽鴛鴦枕

含情少婦倚銀缸繡罷鴛鴦日滿窻
解得世間離別苦故將好鳥織成雙

姚孫槃

三首

孫渠字心甫桐城人天啓壬戌進士知龍游晉
江二縣擢江西道御史謫上林典簿遷吏部主
事歷郎中累遷至尚寶卿有石嶺集

久雨新霽喜殷氏兄弟邀飲

閉門十日陰門外喧屐齒已聞前谿漲更見屬垣圯曜
靈胡匿輝風雨橫如駛暮霞照東隅魚尾差可擬凌晨
下檐楹邂逅逢之子相邀卧甕頭一斗飲未已醉翁意
有在歌者聲且止

車中漫紀 二首

茅店孤燈黯繩牀旅夢安不知一夜雪但覺五更寒際
曉山山白因風樹樹殘憂時誰紀瑞默坐卷簾看

初日照高樹前山霧始開怒飈一以發寒氣轉相催野
色遙難即羈愁莽欲來故人居不遠去去好銜杯

喬可聘 一首

可聘字君徵一字聖任寶應人天啓壬戌進士
除中書舍人選授河南道御史有醉陶集

詩話崇禎丁丑侍御巡按浙江既入境屬吏伏謁道左公首詢先太傳第宅吏以鍾秀坊對旌蓋闌于藉袈之橋公自巷左舍車徒行百步入自門升階肅衣冠拜祠下復坦步出巷之右乃升車鼓吹導以行余總角時目擊其事又六年武陵唐公紹堯分守嘉湖道入境亦展謁先公祠則將及門而步入然禮容甚恭於時弟子敬其先師若是由今觀之正可綴八觚不觚錄也

苦雨

雨喜及時好雲陰竟不開馬牛幾莫辨鷗鷺盡飛來茅濕痕多漏沙崩響易哀田園生意盡排悶強持杯

黃宗昌

一首

宗昌字長倩即墨人天啓壬戌進士知雄縣調清苑選授山西道御史

詩話三殿告成論功行賞長倩時官御史上言國家名器盡為閹寺收買腹心之助大行賓天在八月二十二日而殿工行賞在二十一日正彌留大漸之時何暇出詔此輩直偽官爾詔令指名長倩乃舉黃克縉霍維華呂純如等六十人以對請盡行削除是亦勇於觸邪者已唐諺五角六張作事不成七夕結句蓋用此語

七夕有懷

危坐撫佳節蕭蕭但雨聲閨中兒女態天上別離情秋

入玄蟬急年侵白髮生所嗟垂老意張角總無成

吳振纓 一首

振纓字長組歸安人天啓壬戌進士除中書舍人考授廣東道御史有顛石齋詩集

棲賢看梅

萬樹惟一色半山堆白雲鳥啼村不夜香遠客先聞近寺松陰合橫枝澗影分誰家修竹裏簾外亦紛紛

詩話詠物詩最難工而梅尤不易林君復雪後園林纔半樹水邊籬落忽橫枝此為絕唱矣他

如疎影橫斜水清淺暗香浮動月黃昏僅易江
為二字以竹桂為疎暗是妙於點染者餘則蘇
子瞻竹外一枝斜更好高季迪薄暝山家松樹
下亦見映帶之工高續古絕句云舍南舍北雪
猶存山外斜陽不到門一夜冷香清入夢野梅
千樹月明村可謂傳神好手朱希真詞橫枝清
瘦只如無但空裏疎花數點李易安詞要來小
酌便來休未必明朝風不起皆得此花之神若
朱雍之梅詞黃晞顏之梅苑李龔之梅花衲釋
明本之梅花百詠詩愈多而神愈遠矣侍御樓
賢之作實
獲我心

何萬化一首

萬化字宗元青浦人天啓壬戌進士授南京兵

部主事歷禮部郎中升福建提學副使轉右參政終廣東按察使

詩話宗元仕閩為制府畫策平劉香入楚同諸軍協力擒張普徽是亦開濟之才不徒以雕篆見長者

贈別

彩鷁銀燈此夜親相看莫惜酒杯頻明朝茅店風霜苦縱有盈觴不醉人

金肇元 一首

肇元字木公一字司杓東陽人天啓壬戌進士
除徽州推官入為工部主事調兵部轉員外出
為江西參議進副使遷福建參政

雨過鳳陽望祖陵

濠右鍾靈地關河迴未窮江迴雙闕北淮繞二陵東古
驛荆榛雨高原燕麥風遙瞻松柏路佳氣鬱青蔥

蕭士瑋

三首

士瑋字伯玉泰和人中萬曆丙辰會試天啓壬

成賜同進士出身除行人歷吏部郎中有春浮

園集

趙韞退云先生詩以才慧勝出入宋元

客愁

不待秋風起思鄉念已生
髮愁今夜白月好故園明
孤客人千里荒城鼓二更
停燈沽濁酒屈指數遊程

春日送繆當時被謫南歸

正好留連日翻為惜別人
憐君愁對酒作客怕逢春
芳草迷歸櫂啼鶯傍逐臣
東風如有意莫遣柳條新

滁陽晚行

木杪斜陽道秋風匹馬行古原荒霧白野水暮雲平酒
逐年偏減情因老更生不知今夜月何似故鄉明

宋 玫 一首

玫字文玉萊陽人天啓乙丑進士知永城杞二
縣事選授吏科給事中歷太常少卿大理太僕
卿轉工部右侍郎家居萊州城破被縛見殺

閨思

征人磧裏正思鄉八月看雲送鴈行
生小不知門外路如何飛夢到沙場

陸錫明一首

錫明字幼輿平湖人天啓乙丑進士除工部主
事歷員外郎出知常州府再知徽州府升江西
提學副使

白岳太素宮

天遣名山護紫虛芝泥曾到使臣車
石幢隱見宮中線

碧瓦參差帝者居封禪有書非漢時
榔梅何地不秦餘
未須泛海尋靈藥水落花開自起予

郭紹儀 二首

紹儀字汾仲平湖人天啓乙丑進士除當塗知
縣擢南京湖廣道御史有青蒲草

游仙詩

少室垂三花盈盈秀茵閣我驅一卷石偃蹇卧溪壑輕
陰斂素秋虛篁散紫籜自得枕中祕始知塵外樂容成

采玉芝抱朴煉五藥矯首鴻天長此志欣有託

同官李匡山成寶慈俱以疏劾輔臣被謫感而有

作

花莫盼武陵花酒莫飲烏程酒武陵花豔迷人目烏程
酒甘誘人口李公骨鯁天下奇壯志屹立山勿移此時
朝廷重鈎黨皁囊霜簡無遲疑成公凜凜氣雄發夜漏
沉沉整袍笏漳江學士孤鳳鳴慘澹長弘碧流血成公
裂眥那肯平苦諫危辭三伏闕二公名義垂不朽二公

既去儒林醜武陵花鳥程酒花殘酒歇終何有君不見
柳外東風動江樹輕薄紛紛飛作絮莫遣烏啼白下門
予亦飄然拂衣去

李模 三首

模字子木太倉州人天啓乙丑進士除東莞知
縣選授雲南道御史以憂歸補浙江道謫南國
子典籍有碧幢集

王無異云先生同不失已異
不傷物合乎易所云知進退

存亡而不
失其正者

鬼車謠

鳳皇將九子雖鳴何秋秋羽蟲三百六賦性多令攸奈
何有怪鳥一身伏九頭誰者齧其一灑血聲啁啾晦冥
乃潛出四野風不休人號犬亦吠滅燭收兒樞同心如
禦寇懼其少溜留非徒祓不祥恨非陽鳥儔遺音雖遽
已戾氣猶噓咻是闕玄黃戰豈惟風雨憂吾聞多見可
此類安足仇豺狐並晝嘯前鵠後鵠鶩勞勞服不氏枉
矢焉能讎誓將叩闔闔桃茆殉九州

寒夜有懷

浩浩夜氣長霜風凜寒衾思來乍如髮繚繞不可尋清
夢倏飛越山海何崇深孤月懸青松鶴子多奇音戶牖
洞開豁中有綠綺琴

南思

畦丁忽報韭牙春對對河魴入饌新笑指蘆根堪續命
不須子細祝厨人

陸澄原 一首

澄原字嗣端平湖人天啓乙丑進士除工部主事歷員外郎謫順天府照磨遷大理寺副以兵部員外被察間佳有芝房集

詩話思陵初政職方首攻魏崔海內想其風采無難遽躋臚任而乃厭薄門戶不屑附東林其封事略云有市恩修怨舉劾失平者雖東林亦可謂之小人不得以楊左為護身之符有特立獨行恪共厥職者雖非東林不失為君子不得以崔魏為陷人之穽又云臣寧寡援孤立為硜硜之小人決不依草附木為疑似之君子由是見嫉於東林拒之惟恐不力一官蹭蹬被察而歸放浪山水以詩酒自娛斯狂狷之流也詩亦不入鍾譚流派

溪外

短橋隱隱隔清溪
溪外人家更向西
行盡西溪人不見
一林脩竹畫眉啼

葉紹表 一首

紹表字仲韶吳江人天啓乙丑進士除武學教
授轉國子助教遷工部主事至郎中有遷聊集
甲申聞三月十九日之變

衡門薜荔久侵尋
自媿才非抱膝吟
逝水總流千古恨

夕陽空負百年心
蒼生四海同仇切
白髮三春憶主深
七日誰人牆下哭
一回北望一沾襟

熊開元 二首

開元字玄年號魚山嘉魚人天啓乙丑進士除
崇明知縣調吳江選授吏科給事中謫山西按
察司檢校遷行人司副以言事廷杖削籍遣戍
晚為僧名正志字槃菴居蘇州之華山有華山
紀勝集

詩話魚山欲劾宜興適思陵許奏事者於弘政門召對及入見宜興侍側因言軍事而出既而召見德政殿輔臣亦入乃言曰易傳有云君不密則失臣臣不密則失身臣所言願輔臣暫退思陵諭曰輔臣管密勿能開元前所奏卿等皆與聞可以不退是日不敢盡言思陵命草疏入仍有茶果餅餌之賜迨疏入遂被收思陵怒且不測矣會姜公如農疏有皇上何所見而云然乎等語怒益甚兩公受杖之苦用刑之慘其不死者幸也爰書既上思陵一曰讒譖輔弼再曰讒譖陰狡三曰謗毀校肆人皆疑思陵曲護宜興獨尹樞部宣子謂思陵時已恚宜興命魚山具疏者度必列款欲據之便按問及見疏乃曰如此不痛不癢思兩邊做好人邪蓋實怒其不力參而反以誹謗大臣為罪非思陵本意也斯言得之宣子諱民興亦嘉魚人有菴園集詩務

詭異多牛鬼蛇
神語不足存

鳥道卧獅石

從來入蜀歎崎嶇九折何如此路迂若是香林黑獅子
向前翻擲肯踟躕

穿雲棧

盡日凝雲谷口封倦還飛鳥亦迷蹤何如近借齋廚鉢
鞭取耕烟白耳龍

詩話華山在吳西偏相傳支道林銷夏之所劉
宋時會稽守張裕舍宅為寺縣志稱南渡乾道

中秘書監張廷傑占為別墅然范致能有華山
寺詩云五湖西岸孤絕處梅檀大士來同住蒙
泉新潔鑑泉明淪茗羹藜甘似乳何須苦問蓮
開未桂子葛花了今古三翁彩筆照青霞從此
他山都不數我今閒行作閒客暫借雲窓解包
具魂清骨冷不成眠徹曉跣趺聽粥鼓乾道中
寺未嘗廢張氏別墅乃占斷閒田爾魚
山紀勝詩序中仍沿縣志附疏於此

朱治憫

三首

治憫字子暇嘉興人天啓辛酉舉人選授肇慶

通判

詩話子暇宣勞戎務一星辛卯天南生為進表
之劉琨死作思歸之溫序其詩不沿時習磊落

欽奇至賣宅一律悽惻纏
絲菴苑之草心實傷已

麥章閭贈硯

麥君遺我硯采自羚羊峽鸛之鵠之眼審視碧光眨白
如蕉葉萌黑比魚雲壓中有青青花瑣細不可掐山川
蘊精氣匠石變遺法雀斑幾點露鮒血兩邊夾外規直
且平中池淺而狹注茲水一泓三宿尚容歆我來吏端
州判牘日鈎押勞人何草草有時服韎韐頻年硯欲焚
是物不我甲朝來三摩挲貯以琉璃匣他日抽簪回蓬

憲恣賞狎作詩崇禎年月涂歲協洽

胡將軍一青臨陣歌

將軍用槍如擲梭馬上殺賊功最多馬頭一卒驚鳥過
往來拔刃誰敢何果下之馬山頭坡有時奪取紫橐駝
將軍神勇孰同科除是漢代雙伏波我書露布盾鼻磨
比田僧超壯士歌

得家報知敝廬已賣歎之

拮据經吾手書來已屬人一身猶長物四壁委微塵歌

哭今無地琴尊別有鄰庭梅應為我望絕嶺南春

楊文驄

六首

文驄字龍友貴陽人天啓辛酉舉人崇禎中知

永嘉縣事歷官都御史有洵美堂集

刑孟貞云洵美堂詩

紆徐以導遠篤摯以達情引物連類廣博曼衍
屢出靡涯而源流師法燦然可指史弱翁云
龍友詩沉澹淵
遠有正始之音

游太湖龍觜

晚色澹將夕探竒出林藪大龍與小龍礪齒震澤口鱗

而暑鬣張嶮岬悉諸有落潮洗塗泥寒玉森戶牖淘沙
尋金書人各繫在肘吾欲窮其幽慮為鬼所守肅然袍
笏侍下拜不敢苟豈知層雲根乃勝洞天九

海上作

水驛將三宿茅茨近百家舉鉏刪濕葦迎月伴荒衙燈
下哀汀鴈潮頭漉浦鰕小民方疾走官稅莫紛拏

宿木瀆

竟日秋光冷維舟寄古邨隔橋依榜火晚市辯方言水

已通湖氣沙看露樹根館娃談往事歌舞夢中喧

答陳司理卧子

峻節山陰道魚書過婺州遠人驚異數高論許同舟僻
壤蘭為國荒城竹作樓自憐隨去住淮海亦曾留

苦雨

海國重陰合涼飈五月寒淋漓欹枕聽朝暮倚簾看問
路空懸屐尋山欲墊冠獨憐黃鳥語終日自縣蠻

夜過練瀆

松風謾謾澗粼粼金鎖曾輝畫角新
借問水犀三十萬何如君子六千人

鄭龍采四首

龍采字聖昭歸安人天啓辛酉舉人婺川知縣

有高密堂詩集

詩話聖昭雅尚清狂與烏程丁永鑑同舉於鄉
酒分詩情最相親暱丁有為山閣詩大都北里
治遊之作聖昭牽絲入黔謁楚撫何公騰蛟公
欲留為監紀辭曰朝廷命某宰婺川不命參公
軍事也及解組過楚何已殉難既歸祝髮入卞
山不復與聞世事句如長江無六月驟雨不崇

朝明月幾時上歸雲未得聞花飛晴見雪竹密
畫垂陰殘雪重重白歸鴉陣陣圓暗泉蒙澗草
驚鳥落山花寺隨人意改身列上方閒成
荒遲夜拆人定話歸潮非蹈襲者所及

小雨復止

小雨公然止車薪水一杯已經三伏盡更得幾時來鵲
尾搖晴樹螢光上濕苔終宵仍不寐傾耳聽殘雷

雪崖禪師向有法雲社約別後十年矣適晤在初
溟滓二師於天聖講席出示社中諸作因題

不作陶元亮攢眉為酒杯十年千里外二妙一時來聽

法知三藏瞻雲識五臺何時入林去同看白蓮開

方水檻漫作

竹裏孤烟直溪流釣未歸豆花鋪地白絡緯應時啼半
謝荷重發新紅葉漸微避人最宜遠或恐叩柴扉

采松花

美人采松花紛紛落黃雪花落松枝輕當風更搖曳

張次仲

七首

次仲字元屹海寧人天啓辛酉舉人有待軒遺

集

詩話先生晚隱郊廬高齋上履二
之節詩有真意不盡規撫古人

月出

微涼今夕好月出正當門岸幘微風至鉤簾清露繁客
來宜卜夜吾醉孰留髡軟語勞紅袖頻催碧玉尊

天闕

東風吹大海日夜動孤城若木津難逮乘桴汎有程童
三千徐市士五百田橫料得逢同調援琴移我情

北固山

登臨來北固俯視大江濶鐵甕人烟起焦山水氣深浮
沉天設險來往客何心一塹分南北茫茫自古今

寄陸真如

草綠風翻戶河平水繞村放船隨遠近隱几度涼溫盆
貼新荷葉窻依老樹根悠然觀化理清興與誰論

屏跡蘇村漫題屋壁

鹽官城北郭溪東草屋蕭蕭寒雨中瓜架豆棚新築圃

長竿短笠老漁翁提攜小豎敲茶臼勞苦山僧理藥籠
吾老自應耽伏枕人前那敢說冥鴻

詠史

匕首投銅柱金椎中副車吾謀適不遂天意復何如

苔徑

苔徑路歌危幽人自来去但聞啼鳥聲不識鳥啼處

錢千秋一首

千秋字真長海鹽人天啓辛酉舉人有青崖集

過張王府基

落日張王府春風麥秀齊誰知沼吳士依舊越來溪高皇

帝破吳師
由湖州至

錢嘉徵一首

嘉徵字孚于海鹽人天啟辛酉順天鄉試以國
子監生中副榜晚選授松溪知縣還自閩卒於
里有松龕剩稿

詩話孚于以秋試留國門首上書論魏忠賢十
大罪自漢東京宋南渡諸太學生後久無此風

節矣或勸其勿上孚于忼慨言曰虎狼食人徒手亦當搏之舉朝不言而草莽言之以為忠臣義士之倡雖死何憾自是言者相繼而起元惡乃除信豪傑之士也

福州口號

杜牧三生憶舊遊
珠簾遮住一層樓
此間真色無梳洗
蕙箭開時插滿頭

董守諭一首

守諭字次公
鄞縣人
天啟甲子舉人
有董次公集

詩話次公於詩不屑寄
人籬下然與風雅尚遠

憶婁子柔

與君隔山川邈然託素臆靜言想德容淵致若不測宛
然河汾生論文篤悃悞使我飢渴懷如飽秋稼穡斯文
儻我期願言求懿德

鉏用登一首

用登字百穀秀水人天啟甲子舉人

小園初成陳仲醇過

版築登登罷圖書處處遷茅柴過橋酒燈火到門船竹
徙上番雨荷開半兩錢醉吟無不可為我拂朋箋

沈弘度一首

弘度字公雅桐鄉人天啟甲子舉人有五願齋
集容餘軒稿畏吟小草

憶北園

頗憶衡門下幽居有北園覆檐新竹嫩滿地刺梅繁好
友時來過清琴每自援齊民有要術試驗老農言

池顯方一首

顯方字直夫同安人天啓甲子舉人

西湖

暮靄朝烟色轉濃微茫不辨是何峰
堤花半上春人鬢湖水長留昨日容
逐粒禽魚爭一隊同舟男女坐雙重
南朝歌舞沉荒草愁聽黃昏兩岸鐘

譚元春二首

元春字友夏景陵人天啓丁卯舉鄉試第一有

譚子詩歸

張文寺云伯敬入中郎之室而思別出奇以其道易天下多見其不知量

也友夏別出蹊徑特為雕刻要其才情不奇故失之纖學問不厚故失之陋性靈不貴故失之

鬼風雅不道故失之鄙一言以蔽之總之不讀書之病也

詩話鍾譚並起伯敬揚歷仕塗湖海之聲氣猶未廣藉友夏應和派乃盛行詩歸既出紙貴一

時正如摩登伽女之淫咒聞者皆為所攝正聲微茫蚘竅蠅鳴鏤肝鉢腎幾欲走入醋甕遁入

蕩絲充其意不讀一卷書便可臻于作者此先文恪斥為亡國之音也桐鄉錢麟翔仲遠友于

友夏恒言詩歸本非鍾譚二子評選乃景陵諸生某假托為之鍾初見之怒將言于學使除其

名既而家傳戶習遂不復言云

讀曲歌

交歡久貝齒有時落歡獨長在口

得蜀中故人書

蜀川兵定人靜老友天寒信來莫怪草堂深閉小橋邊
有門開

吳有涯一首

有涯字茂申吳江人天啟丁卯舉人崇禎中署
金壇教諭遷平陽知縣晚為僧隱鄧尉山

送張向之之京口

張子頭多白
隆冬獨往還
辭家一束被
踏葉萬重山
天末兵方擾
雲中詩自刪
攜筇更何處
笑別向昭關

張永禎 一首

永禎字仲燦
順天人
天啟丁卯舉人

薊州道中

匹馬漁陽道
休嗟行路難
霜林無定葉
秋水有餘寒
白雁飛初下
明霞落未殘
盤山凝望裏
烟外出層巒

胡振芳 一首

振芳字來子秀水人天啟丁卯舉人選授漢陽知縣

歸里後碧漪坊黃氏要主童子塾

自返牆東宅何曾竈突黔已無五斗米笑脫兩鞢褫旅
夢安蕉鹿浮名上竹鮎從今兔園冊一任老夫潛

明詩綜卷七十一

欽定四庫全書

明詩綜卷七十二

翰林院檢討朱彝尊編

魏學洧 十六首

學洧字子敬嘉善人贈太常卿大中子鄉人私謚孝烈先生有茆簷集

靜志居詩話魏忠節公被逮日天大雷電子敬徒跣攀號請隨行公語之曰覆巢豈有完卵父子並死無益也子敬乃微服緹騎後探起居抵國門邏卒四布乃變姓名匿都市營救不可得

公既薨獄扶襯歸朝夕蹣跚未嘗一入寢室淚盡脣焦家人捧水漿以進却之曰吾父詔獄中孰夜半而進之漿者病且革進以藥則又却之曰吾父詔獄中孰診視而進之藥者歷數旬而哀毀死矣思陵即昨朝士上聞于朝以是海內稱為孝子大學士同里錢公士升序其集云子敬之志父存則不獨死父死則不獨生是誠孝子之知己矣當甲子秋忠節掌吏垣以激濁揚清為已任天下仰望太平子敬獨私憂之歎曰無根之草其能久乎物不可以終通天殆蘊隆正人之毒而速之感也

未替而禍作人服其識

猛虎行

北山有猛虎不牝亦不牡哀哀無辜人吞噬十而九猛

虎且勿道蟲乃伏其尻壯士困顛躓蟲喙紛相撓為語
行路人且復忍此蟲撲蟲誤驚虎滅影苦無術虎頭置
短枕虎皮罩塵埃猛虎有死日蟲乎何有哉

長水怨

為友人
妾賦

妾家住長水長水東西流青青湖畔柳迢迢湖上樓十
三學釵書十四工瑩篴十五臨憲繡精妙世無儔翩翩
少年子窈窕行相求借問樓上女可似羅敷不里嫗前
致辭願君且淹留美人好顏色終日樓上頭兼之臨憲

繡精妙世無儔君子謬垂盼聞言中心喜語我長者行
同聲謂應爾郎君美風度玉樹蒹葭倚十九渡長江聲
名若江水好花不獨榮天生合連理行行隨君去默默
思故里牽帷幾回喚低眉羞欲死臨鏡貼花鈿可憐體
無比紗窓春日午脈脈情何已憶我在家時拈香繡大
士金刀翦素綾瑩瑩白於紙刺成蓮花葉彷彿香風吹
香風吹入夢夢到蓮花池繡痕細難識但覺生蛾眉靜
玩坐逾久忽忽心自疑似曾親見佛不知身是誰綾額

尚餘尺皚皚冰雪姿淡濡碧玉毫邀郎為題詩郎書擬
右軍妾心亦委婉鍼鋒與筆意曲折隨郎轉繡罷持似
君秀色堪舒卷顧我每微笑妾顏先自覲落地為女子
可憐側室難陡然一回想心事慘不歡雖復蒙君憐蛟
綃恒不乾大婦貴家女妾身臧獲看上堂伺音聲下堂
候顏色含羞入空房惻惻潛相憶雖然潛相憶無用長
太息誠得君子歡不怨長離隔大婦奄逝世一家身獨
當漂蕩若浮萍隨君流四方南都復北都終歲長道旁

黃金散欲盡不思歸故鄉壯志在四海妾心暗悲傷君
怯不勝衣年來益憔悴十日九卧病奄奄滯旅次妾首
如飛蓬并日忘食事上無姑嫜親下無得力婢旋出又
旋入常恐呼不至憂勞填胸臆刺刺肝腸碎歲月漸消
耗妾身亦不支帶圍日趨緩空復存腰肢事君垂十載
不一生男兒羞佩宜男草悵然心中悲君嘗兩畜婢中
道旋棄之妾身非不容君自輕別離暮春三月盡束裝
謀南歸買舟僅如葉帷幕不得施長夜泊豐草巨蚊攢

氷肌生小長閨閣辛苦實難為入秋弛行李儼人樓上
居小姑家海濱聞之亦來依雖非久居計氣息聊得舒
良人忽生心娶婦支門閭隨珠飾翠幃黃金飾綺疏紅
羅複斗帳寶馬七香車今日媒妁來東鄰有美姝明日
媒妁來西家有西施妾身匪木石焉得不孤悽對鏡影
如削安敢生言辭禮數任頽頽難比先孃時新人入門
來灼灼豔威儀二九頗不足二八頗有餘女伴覩鸞緯
嘖嘖相嗟咨君心愛幸絕迴與舊人殊非必顏色殊新

舊自相渝新人哭亦妍舊人笑不如孤房過慰藉眊眊
聊斯須情知心不存詞說空爾為新婚浹旬日忽作南
都遊俗語莫空房挽衣不能留新人暫歸寧登車去由
由妾身姊為母同君亦登舟耳綰雙明月墮髻垂金塗
飄飄蕩湘裙色如安石榴輕盈作纖步翩若雲端游鄰
女相擁簇朱顏自生羞十年方得歸一喜還一愁顧君
色悽慘何用心恻恻莫非眷新昏懷此離索憂千喚不
一答默默自低頭舟行到長水妾自還家裏親戚往邀

君君固不肯起詰朝云解維舟中須盤桓勿用再往返
各使中心安恐君塗上寒幅巾裁合歡恐君塗上飢烘
栗盈珠盤木落霜露急勿使衣裳單千語屬奚兒勸君
幸加餐平明奚兒至顏色驟驚顫向前往叩問流淚先
被面郎君乞致辭此生勿相見十年恩愛深謝卿重依
戀奈卿久專妒會見中情變不如痛割絕免使腸輪轉
妾身得聞之狂頓摧心肝天乎我何辜天乎真無端雖
在夢魂中不料遭弃捐恨無晨風翼迅駛追君船淚珠

千萬斛那得飛君前牽衣一慟哭身死妾亦甘縱然被
驅遣曷不先一言一去永決絕何處鳴煩冤自從入君
門歷今垂十年雖彼雞與犬亦當念周旋如何鐵石人
一絕弗復憐椎胸胸血嘔委身赴清水骨肉痛如割
黽勉相救止姊恩父母深我生不如死尚冀南都還重來
過吾里性行吾熟知茲望殆已矣昔年別兩妾我淚揮
不止誰料行及身苦境苦如此嗚呼倉浪天茲恨何日
已新人入我門繡帷長日垂依稀覩容貌猶未通言詞

臨行詳睇視恰在登車時蚤知生死隔揮淚一致辭念
與小姑別淚落如連珠妾初進門來小姑九歲餘探懷
索果餌髮亂呼我梳今來已成婦骨肉情依依長別不
一語腸斷當何如我有兩了鬟事我五六年大者髮覆
額小者亦比肩晨興聽呼喚夜深候我眠而今永隔別
涕泗紛潺湲平時解思我料爾當亦然掩淚入房來意
前見鍼帖殘絲與剩綫寸寸皆儂血向日入君目從今
長斷絕委婉隨郎心郎心太曲折忽見大士像不覺淚

滂沱稽首乞慈悲妾身竟如何今生無罪過宿生愆怨
多安得轉君心春風被女蘿君心終不回不如赴長河
稽首乞慈悲再拜涕漣漣不望重聚首但願相見時雨
落不上天一見知何期婦人失夫心百念無可為但願
新人歡為君生男兒更念孱弱身疾苦不相離舊人識
君性新人安得知十年守窮賤心事多苦悲願君振高
翮及時凌風飛妾身長已矣相見知何期一字一嗚咽
行道皆酸悽

朱近修云源出孔雀東南飛作而不盡規撫字句才氣無前

擬古 三首

游思隨飄風遠歷杜陵道道旁合歡花悉成斷腸草紅
顏不堪駐妾愁君亦老為樂速良辰歸來何不早人生
數離別百年非壽考擾忙風塵中榮名詎為寶

所思不可見彈古相思曲曲中竟何言理短情自促野
卉非不香采之徒躑躅今日白頭吟昨日黃金屋

誰為不死人懷此終日憂來日當大難今日且行游行
游須及時古語恒如茲口爾身不然留為他人嗤今古

更相笑游者無還期

和陶 六首

偶步短檐下淡雲如遠山
變幻斯須間玩之欲忘言
柳青菊花黃樂飢以長年
優游苟能爾奚用百世傳

志士有奇懷何為翳我情
吾身如聚沫所寶非榮名
但問寓世間何以了一生
秋風隕枯葉慄慄心自驚
時哉不我待淹留欲何成

夕陽在高柳黃葉依風飛
我心匪傷秋不覺心獨悲
慷慨

慨向前行動念多所依長道眇無畛究竟將安歸中夜
發長嘯一嘯百念衰但得此中樂百年願無違

鄰家有新竹日夕百鳥喧更有古梅花植我西北偏啓
窓與相向幽幽同空山朝看樵豎來暮看樵豎還似得
古人趣有意未敢言

忽忽有所思乃在天一隅豈敢憚修阻去去登前途驤
裹猶不疾揮鞭冀長驅向謂萬里長萬里更有餘一朝
悟馳逐轉盼歸其居

問余何所好所好在六經不作亦不述好古未有成笑
彼百家言夏夏何紛更屏去勿復覽閉門書黃庭滴露
小窓前好鳥向我鳴此際意無限默默緘我情

讀史 三首

魯仲連

鄙夫寧一身身外非所計有如魏帝秦何與魯連事先
生獨個儻慷慨決大義白日走秦兵誠哉天下士

荆軻

蕭蕭易水波日晏客未至十三死灰兒勉強共大計坐
中擊筑人何不克秦使田光死也餞於期死也贅空死
一無酬烈士喪英氣願逐酒人游哭盡不平事

諸葛亮

受託誠不易知人良獨難南陽比子房誰為鄧與韓將
相兼簿書心中多苦酸十出九空歸一身亦凋殘為君
歌梁父中夜發長歎

九日同嚴知章澹如兄弟遊茶磨山

我來松陵尋好友到門恰值九月九主人大笑攜上船
船頭載花腹載酒舟子勸上姑蘇臺衆客首肯我獨否
青山宜作生面觀耳目熟爛妍亦醜但問誰家富修竹
我船便纜堤上柳布帆直指吳山陲起覽奇蹟竟何有
洞庭縹緲波雲沉彷彿頑沙卧千畝細雨斜侵濕布袍
放船倒出蓮花淩上方樹杪插浮圖石湖湖光照戶牖
隔林前度茶磨山共約聽歌到申酉驟觀山石勢頗仄
愁無平壤安杯斝斯須簫管咽流雲畫船別駐清溪口

蘆花楓葉舞涼風
豈必美人垂素手
同來伴侶大叫絕
私喜茲擢良不苟
寒蒲縛蟹一十輩
烏巾注酒七八斗
酒酣不厭觴
令酷衆人或辭我
輒受推憲更問曠
與晴皎月若出當
坐守

茅簷雜詩

只在塵寰內居然徑獨迂
此君疎類我石丈老於儒
候雨迎鳩婦栽花雜鼠姑
客來深自慰知有濁醪無

王屋

九首

屋字孝峙初名曉字蘭九嘉善人有學可齋詩

箋

魏禹平云山人詩蒼茫磊落不作喁喁細響

詩話孝峙以詩受知魏忠節因與忠節一門羣從和酬詩類劉改之詞學辛幼安嘗過同里曹學士齋學士曰先生尚能著屐遠步邪應曰有太史公不可無牛馬走鄉里傳為新語

秋風辭

秋風秋風汝何殺我芙蓉摧我梧桐梧桐折兮芙蓉死
鳳鳥安棲兮鸛鵲安宮鸛鵲逝兮文章隱鳳鳥不至兮
吾道窮夫誰使我至此極孰非爾朝夕之秋風

子夜歌 三首

千金買良玉，百金求良工。
為儂作雙環，相連無始終。
妾身妾自惜，君心君自知。
莫將日後情，不如初見時。
家有千黃金，不如得郎心。
家有千倉穀，不如抱郎宿。

陌上桑

可憐陌上桑，朝看沃若暮萎黃。
餵蠶不了餵牛羊。

春日過聞溪，贈別許清機

我適後君來，君復先我去。
人生如飄蓬，能得幾回聚。
君

今別我歸何處直到錢塘江口住江水江雲日日流相
思時倚江頭樹

辛酉端陽日

午節今朝是開尊召酒徒趁晴刪艾葉冒雨翦菖蒲重
碧杯中滿輕黃額上塗醉憐雙鬢短還插健人符

送黃海歸新安

清秋客子歎歸歟載酒題詩一送渠細雨亂山遮汝去
淒風落葉對誰居江村處處休黃犢野店家家賣白魚

見說雅懷多不減每逢佳勝輒停車

題黃大癡橫幅山水

絕壁長松倒影低寺門殘日響迴溪
老身意想如曾到
八月虞山拂水西

陸寶十五首

寶字敬身鄞縣人官內閣中書有霜鏡集

曹能始云

中翰詩逍遙容與蟬蛻塵埃之外

王伯穀云

敬身詩篇麗逸讀之唯恐其盡

屠田叔云敬

身古詩敦厚得江謝門風

近體深沉具高岑家法

詩話敬身近體好用助語辭不無狃於公安景陵之習然其才氣奔逸勝葛震甫陳仲醇且十倍近李處士果堂輯甬上耆舊詩凡四百三十人三千餘首自謂搜隱獲奇而敬身曾與余太常君房屠儀部緯真楊處士伯翼識面卜鄰者乃獨遺之何與

五雜俎

五雜俎綺千箱往復來輦金忙不得已獻大璫

怨歌行

天胡以不五風十雨而旱潦螟賊歲靡有寧人胡以不披襟吐哺而爪牙毒螫立意相傾世胡以不解繩錯象

而戈矛荆棘日尋戰爭怨歌行此怨何時平

相公來

相公來合軍驚千夫執爰除道郊迎相公下車命長揖
口雖不言心內泣伍符尺籍新有名鶴入鷄羣從自及
昔時直上何壯哉呵聲百口迅如雷行者止立坐者起
沙堤如拭大車來一朝禍至棲叢棘不賜屬鏤猶主德
卓帽騎驢出國門東海東頭聊假息秋高汎撤問歸船
手挈行囊只半肩富貴如雲真大夢胡椒鍾乳在誰邊

春雨

吾廬不厭晴吾田不厭雨禾焦恒苦飢屋漏卒難補人心安有極天意竟誰主敢以一人私而忘四郊苦雨亦恤民間涔涔注環堵待旦問田家立苗青可數歡然荷鋤歸兩稅登天府

大水

瀕湖盈百堵積潦失寧居舟反高于屋人誰免作魚撈萍迷曲巷望柳認前除正及西成日憂深藿食餘

光宗皇帝挽歌 二首

辨色初勤政，龍樓御蹕臨。
禹謨咨益稷，殷祚促丁壬。
禁雪沾衣白，宮池染淚深。
他年青史上，從諫識天心。

喪車蘭殿出，隧道柏城通。
七月期方至，元年厯未終。
仙遊無棄屣，臣節有號弓。
嗣聖鴻猷在，河山豈盡空。

周斗文自易水歸，縱談燕太子及荆高遺事，慨然賦此。

每讀燕丹傳，長悲易水遙。
聽君談往事，風起復蕭蕭。

庚午元日

官廚柏酒泛紅霞
烽戍初停聚飲譁
遙祝萬年天子壽
小臣九十日看花

行嘉善道中夜宿朱涇

春潮覆草半江青
長水分塗客未經
少理蠶絲多織布
百家烟火傍朱涇

齋居 二首

層層樓榭枕松關
每到花時獨不閒
酒榼茶罇人去後

窓前一幅米家山

浴蘭初罷振纖絳竹枕桃笙手自攜避熱不教人點燭
滿樓涼月照登梯

送人之秦川

水鳥低飛狎榜歌木蘭雙槳送凌波浣紗人在中流見
錯認前山作苧蘿

湖上

承恩坊裏綠楊烟翠幄朱樓大道邊誰似儂家湖上住

當門人上木蘭船

廣陵懷古

茱萸灣接古邗溝
白塔河分上下流
疏鑿當時有深意
徒勞關吏日持籌

趙宦光 一首

宦光字凡夫吳人有寒山雜著

詩話凡夫以篆書名略用草書體書之號曰草篆紺園琳觀精舍名園或乞其書題扁所撰說文長箋一時紙貴然自解人觀之未有不齒冷也古之小學書數方名字或不正童子皆知之

自周秦及漢無不識字之學生其後大小二篆生八分三真六草諸體雜出古法未盡亡者賴有許叔重說文一編自一至亥本之倉頡迨譌以四聲說文亡矣顧野王玉篇其文多於叔重孫強又增益之迨題以大廣益而玉篇亦亡矣蓋書之最古者莫如篆學野王雜以隸書已失其舊李陽冰刊定說文頗出私意詆訶許氏學者已恨之凡夫草篆其又何所本乎世人一遵晦菴朱子之說以灑掃應對進退為小學書數方名槩置不講無怪乎小學放絕篆法日微可歎也已凡夫饒於財卜築城西寒山之麓淘洗泥沙俾山骨畢露高下泉流凡游於吳者靡不造廬談讌廣為樂方特於韻語遜其鄉里

登華山

鳥道縈紆上深林幾折盤支公此銷夏五月晚猶寒

朱鷺四首

鷺初名家棟字白民吳人有青浮子顏賴

詩話白民負奇嘗獨游黃山遠尋嵩華所至畫
竹以自給家居撰建文書法擬思進呈請復革
除紀年不果崇禎初騎驢入都上所作甘露頌
又不果歸結茅於郡西華山蓮子峰下躬親井
臼不願見貴人年八十餘乃卒是時隱居者王
在公芥菴趙宦光凡大時稱吳下三高而敦古
節者白民為最文
文肅特志其墓

自君之出矣

自君之出矣春去勞我思春去明年來君來定幾時

二龍見

感東宮議
立未定

一龍蒼一龍黃黃者不可以為蒼蒼者不可以為黃

過曹氏園值玉蘭盛開

花光何璀璨八窓搖一色春風過酒人忻與花相直

謁采石磯李白祠沽酒不得

先生邀月飲江邊此月年來夜夜懸我念先生對今月
恨無一斗醉祠前

徐弘澤一首

弘澤字潤卿號春門嘉興處士有竹浪齋集

李君

實云隱君詩喜白香山陸放翁流利清越不為
鈎棘索隱陳仲醇云隱君詩清真流便雅類

元白

題畫贈李尚寶

風卷長蘆晚雲開積水明沙邊雙白鳥逐我釣船行

周應儀五首

應儀字元度吳江人光祿寺署丞有南北游草

詩話元度絕句小
詩極其纏綿溫麗

爛溪 二首

明月溪邊路秋風溪上船
船頭何所有滿把水中蓮
我家爛溪邊出門即溪水
秋來溪水深處處菱歌起

夏日

風萩蕭蕭日欲斜
水村無處不荷花
遙看白鷺忽飛去
占斷柳陰一片沙

夏季風雨大作

急雨斜風百尺樓樓頭殘暑一時收而今炎景成蕭瑟
零落荷花十里秋

聞歌

桃花扇底落紛紛宛轉清歌一曲聞醉殺文園渴司馬
酒壚斜盼卓文君

張大復

一首

大復字元長吳人有梅花草堂集

少年行

連錢細馬繡纏髮翻鎗歌鞍踏曉風鞭指綠楊深樹裏
誰家小袖杏衫紅

王履和一首

履和字仲美邢臺人

驄馬行

紀乙丑林
侍御事

貂璫行驄馬鳴緹騎至驄馬避驄馬欲鳴聲不長君不
見昨日新殺屯田郎

祝守範

三首

守範字更生海寧人有非非集彋彋草枕中拊

缶壘室停雲諸稿

雨中過郭四封畦別墅和王二仲臯韻

隙地新栽竹清陰覆短牆探幽停客舫引興雜飛觴
雨沾花徑春流到草堂物情渾可適機事久相忘

哭姑徐孺人訃自蜀中

萬里勞行役經年苦未安風塵多躑躅蘭蕙忽凋殘
旅櫬荆門遠歸魂蜀道難空餘游子淚泣涕滿江干

急雨

野曠雲垂黑山高雨驟昏
鳥飛不過樹人急欲投村
暑氣清疎簟涼飈度晚軒
客心愁襖穢賴此滌塵煩

馮嘉言 一首

嘉言字國華慈谿人天啓初諸生有十菊山人詩集

月夜舟行

薄暝南川路相攜上釣舟
江風鳴遠樹野水映危樓
濁

酒高歌處征帆古渡頭月明動幽興擬作五湖游

顧猷

三首

猷字若昔嘉興人有桃花里集

出塞

漢將當年此望鄉高臺雲物自茫茫羌笳漫引孤城月
金柝旋催子夜霜木落五原秋色淨草枯千磧暮烟黃
材官朔漠聞廉李烽火年來總不防

秋夜泊謝村

水上人家半掩門，寒鴉棲盡欲黃昏。
孤舟夜泊依紅樹，記得唐人詠謝村。

西湖夜別葉環中

水落西陵日已斜，濃烟疎柳半藏鴉。
相逢莫漫輕相別，燈火湖頭是酒家。

張志遠

三首

志遠字叔明嘉興人有竹嶼吟藁

詩話叔明隱於市廛詩為李九疑太僕所賞句
如沙崩樵徑斷水濶野橋危香吹新竹粉翠惜

小荷錢論者極稱其
清醇穩順不誑也

擬古

七雄事紛爭
嬴秦獨虎視
阿房亘長衢
轉眼成荒壘
縱橫一何深
翻為逐鹿始
豈若魯仲連
千古名不死
偉哉達士心
榮華安足齒

集慶寺作

參差紅樹倚晴空
柳栗行吟度晚風
忽憶翠華臨幸處
滿山黃葉寺門東

泛月

烟雨微茫水國秋暮霞飛盡月當樓誰家短曲續長笛
吹墮微霜上客舟

殷仲春 二首

仲春字方叔秀水人有棲老堂集

詩話方叔躬耕永樂南村陳仲醇贈詩却羨白
頭殷處士鷓鴣聲裏獨耕田是也家居社南諸
弟分處郭西之竹橋方叔葭牆茅屋不蔽風雪
慕王績為人亦自號東臯子以醫為業得錢即
入市買斷爛書讀之念浮屠道士之撰述皆編
入藏乃盡收醫書著錄號為醫藏岐黃家以為

總龜馬方叔以天啓
辛酉卒仲醇志其墓

湖上岡

桑柘隱斜日獨登湖上岡誰人攜小櫂載酒出菰蔣

仲夏同仲醇子逸伯承秋潭汎舟城西

兩槳夷猶風幔低湖流清淺荻蘆齊相將迎入烟波去
晚泊竹橋西更西

陳元素 一首

元素字古白長洲學生

贈錦衣衛經歷白超宗

參軍也得謁金門莫憾官卑獄吏尊彭澤先生新令尹
參軍以彭澤令調香山居士老聞孫衣歸質庫仍留客印閣閒
牀且校文冷署久淹殊不惡請看三載著書存

黃光昇 一首

光昇字義輪吳江人國子監生有破甕集

懷許受先

玄符綠字細能分家學須知有說文此去橋門舉十鼓

金匱山房詩集
卷七十二
竹籀書難讀益思君

陸嘉穎 二首

嘉穎字子垂蘇州嘉定人天啓中官主簿有硯

隱集

望君山

木葉下蕭蕭山容更寂寥浮天江縣小隔樹海門遙帝
子何由降騷人不可招無心貪利涉來往信漁樵

如臯道中

滿目桑麻雨露稠
白花籬落遠清流
家家魚畧村村酒
絕勝淮南十一州

吳道一首

道字實儒吳江人有山響齋詩草

一室

海內誠多故先生一室寬
敢期花爛熳粗喜竹平安
曝背晨曦暖推窓夜月寒
遠遊無勝具四壁有烟巒

周楨一首

楨字伯知吳江人有不夜齋詩稿

詩話伯知性最緩嘗與其弟同舟宿有偷兒挾
窻入竊其篋伯知審視不語比其弟覺訶之偷
兒踉蹌出伯知徐曰吾欲靜觀其如何脫身奈
何使彼狼狽而返鄉人傳以為笑其詩流便而
乏警策由其
嬾於推敲也

寄季華弟讀書石湖草堂

青山遙入夢詩寄別愁生雨過添秋色雲開驗晚晴
花鋪地滿澗水入池平轉憶湖邊好中宵月倍明

陳衍四首

衍字磐生閩縣人有大江集

詩話磐生與徐興公同入曹能始閩風樓詩社而賦才儒鈍光燄鬱而不舒其自序比於春草蔓生秋蟲孤響良亦自得之言

善才岫夜坐

江烟吐寒燄倒影星河明潮回石勢險孤岫西南傾扶筇倚危坐仰攀崖樹橫夜色一何曠波濤良未平奈何羈塵鞅促促浮此生吾愛鄭子真谷口田可耕

送潘子才

送客上高樓樓高望客舟但見帆檣立不見客回頭始
知登遠道兩情難自保

聽泉閣早起

山曉天氣肅衆星望已空殘雨戀宿雲猶在寒巖東物
象紛勞役明晦互有窮琤琤石上泉日夜流無終

十不願辭

不願化天上月那得盈盈長不缺
一不願化天上星白
日一照不分明
二不願化土中石受人踐踏無人惜
三

不願化水中灘十步上來九步難^四 不願化窓前鏡十

日不磨光不瑩^五 不願化沉水香煎熬燒灼心摧傷^六

不願化郎馬鞭下馬將他壁後懸^七 不願化白紈扇顛

倒要他遮郎面^八 不願化錦鴛鴦未必雌雄守得長^九

不願化楊柳花隨風飄蕩落誰家^十

吳為霖 一首

為霖字景傳無錫人有白賁集

詩話景傳詩如集場墟市骨董
斑駁陸離即而視之一錢不值

客有澄江歸有贈

浮遠堂前路微風穩放舟江昏茶磨雨烟暝弩臺秋入
饌花雞脆開封綠蟻浮西塘十八里來往候潮頭

詩話浮遠堂在君山宋紹興中建淳熙間李鶴
田珏為江陰司法題柱聯云此水自當兵十萬
昔人曾有客三千羅春伯點題名云淳熙丁未
九月既望同侯叔平等九人登君山夕陽在波
帆影散亂平淮千里去鴈無極蒼然暮色自遠
而至須臾月出東山之上江水湛然風露清美
不知在人
間世也

吳一元一首

一元字堯開宣城諸生

冬望

野爨孤烟起灘舟一水膠
深林餘敗葉高樹見危巢
地僻無行騎家貧驗素交
年年玄草在誰解子雲嘲

戈金湯 一首

金湯字帶如平湖人用秦子

郊游

雨過青山碧四圍
春風輕颺百花飛
極知良會非容易

馬上何妨酩酊歸

麻三雍 一首

三雍字仲雍宣城諸生

自平陽還襄陵道中聞蛙作

三月三日試春衣千山萬山花亂飛行人何處覓相識
啼鳥有時催早歸日漸衝山鞭影急烟初迷樹水光微
草深陣陣喧蛙鼓鵝鴨軍聲似也非

張 丑 一首

丑字青父長洲人

詩話青父精於鑒古所撰清河書畫舫真蹟目錄時人比之黃伯思周公瑾詩草無傳亦有節度

墨皇齋卽事

用拙經營少居閒興趣長閱書宗海岳展畫得瀟湘玩
世歌漁父陶情付索郎向平昏嫁畢白首杖枕榔

陳士鵠一首

士鵠字季方秀水人有鍛齋集

秋光好

何處秋光好秋光在狹斜碧添螺上黛黃入鬢邊花蓄
意纏頭錦輕寒繫臂紗江州何必怨任爾聽琵琶

王彥泓十八首

彥泓字次回金壇人慈谿儒學教授有疑雨集

詩話風懷之作段柯古紅樓集不可得見矣存
者玉溪生最擅場韓冬郎次之由其絨情不露
用事豔逸造語新柔令讀之者喚奈何所以擅
絕也後之為豔體者言之惟恐不盡詩焉得工
故必琴瑟鐘鼓之樂少而寤寐反側之情多然
後可以追韓軼李金沙王次回結撰深得唐人

遺意起句如雨下春泥月下霜幾年辛苦是蕭
郎一層芳樹一層樓只隔歡娛不隔愁月到西
南倍可憐照人雙笑影娟娟中聯如燒燈院落
更衣影聽曲簾櫳點履聲當初語笑渾閒事向
後思量盡可憐畫舫簾衣凭雪蕩王箏絃索見
春蔥明明可愛人如月漠漠難尋路隔烟臨水
偶來同倚檻隔花何路可登樓封來淚點紅猶
濕翦後香絲綠未齊繡佛像前同下拜泥金經
尾獨僉名含毫愛學簪花格展畫題看出浴圖
花下小樓堆燭淚柳邊低舫戴茶烟翻成繡譜
傳人畫會得琴心允客挑窓下有時思夢笑燈
前長不卸頭眠結句如水國不生紅豆子贈君
何物助相思殘陽欲度梅梢盡纔向紅窓拂鏡
奩蠟照漸微香地冷珮聲纔達畫堂東闌干一
曲無多地才著思量便渺然仙家合住烟霞外
金屋藏渠也不堪今日席間誰認得舊時家令

沈休文分明蠟燭身相似纔上歡筵淚已零一
生長羨金泥蝶顫向釵邊與鏡邊皆饒風韻誦
之感心嫖目
迴腸蕩氣

寄懷叡仲秣陵并促歸騎

春光漂蕩別離天心似游絲百尺牽見說人歸歸鴈後
那堪淚落落花前南都翠黛宜為史北里紅箋定幾篇
爭似碧窓銀燭夜月痕依約話纏綿

寄懷端已白門

客懷難耐日初長馬影斜陽踏幾坊花下玉杯嘗苦蜀

燈前銀葉試甜香

皆南朝風物

愁來但禱清溪廟醉後無忘

紫佩囊為覓繡鞵金縷樣倒提纖手學南唐

通客叔菊筵

幾拍吳歛日漸曛後堂香發卷簾聞登牆雪貌東家子
映燭明姿左阿君花氣與人渾不辨竹聲如肉驟難分
分明玉樹尊前坐知是何人夢裏雲

無聊

把書移枕近牀稜歎息觀濤病未能怯暑心情猶喘月

背時風調獨懷冰無勞天女持花散有媿高人選藥稱
肯過小樓言笑否不嫌同上第三層

用陶弘
景事

城樓暝望

魚鱗波面夕陽微旋見遊船續續歸酒後笙歌催急拍
城根燈火喚開扉孤楊傍水疑人立病葉零風似蝶飛
明旦出游晴得否月輪添暈幾重圍

無題 三首

花繞迴廊曲繞梁暗中偏認杜蘭香登樓未定銀顰顫

避燭難禁鳳。慄狂怕見月痕催。月姊恰宜秋色對。秋孃持裙半刻留仙住。纔隔紅簾便眇茫。

夜飲朝歌醉未眠。輕狂全是倚孃憐。妮他細語挑鍼綫。替我悲愁肄管絃。夜月不移歡枕畔。

借用不
夜珠事

春山長坐

酒壚前。何當萬玉親。磨墨立到琉璃硯。匣邊

怯上蘭舟細步來。笑看波影按金釵。陳王著眼先羅襪。溫尉關心到錦鞵。把酒慰衣容旋學。摘花烹茗任頻差。船孃為近牕紗。泊免踏前門月露街。

有贈

秋風長簾恨三年續命曾聞喚小憐已向綠珠稱弟子
儻容張碩伴神仙筵前笑顧櫻桃擲燭下偷分茉莉穿
端似悼亡唐後主見伊枝葉又情牽

代所思別後

阿姚

相逢羞澀怕猜嫌別去那知悵恨添獨對鏡奩空怏怏
乍拈鍼翦復懨懨夢魂弱絮從風亂心緒繁花被雨雷
悔不暫留歡且住未妨長隔一重簾

續遊

嚴城間阻夢魂通
小市門東更向東
翦燭寄聲書草草
背燈彈淚去怱怱
花繁竹暗應迷路
蝶趁鶯梢有便風
梅蕊膽鉗看漸減
每朝分插到釵叢

賦得別夢依依到謝家

名花偏作隔牆枝
愛影憐聲入手遲
門第敢言非道蘊
才情端喜是芳姿
桃邊未許裙題字
子敬事柳下曾將帶
乞詩今日眼波微
動處半通商略半矜持

左卿阿鎖

玉淨花明秀出羣左家重見舊時芬因披樂府吟嬌女

便上藩車訪阿君

見陳遵傳

素豔乍看疑是月清歡何暇想

為雲那禁手炷熏籠罷笑遣蕭郎覆畫裙

追和唐女冠魚玄機十二韻

閨門文采羨玄眈更有青溪妹第三生小不闕青瑣閣
家常希換白單衫釵梁風定蟲猶顫裙衩花深蝶競銜
雅謔引經推鄭婢狂詩送抱想吳男紅兒詩裏歡兼恨

素女圖前笑帶慙想見隔屏聲砑砑似聞昵枕訴謠諠
加餐意託琉璃匕寄札愁憑瑋瑋簪
古詩何計通音
信蓮花瑋瑋簪
有鵲頭能助憶願為雞舌與君含遙猜蹤影心先妬未
接言辭性已諳體自生香防姊覺眉能為語任郎參髮
光可鑑千盤滑脣味如飴一嚙甘記得那時偷近處唾
絨紅點碧意南

寒詞

三首

從來國色玉光寒晝視常疑月下看況復此宵兼雪月

白衣裳凭赤闌干

夜迢迢更路迢迢澹月飄燈自過橋想得阿嬌燃燭待
也應初換第三條

窻樓映日滿樓明雪豔初臨曉鏡清良久自看還獨笑
不防身畔立卿卿

過婦家有感

歸寧去日淚痕濃鎖却妝樓第二重空剩一行遺墨在
丙寅十月十三封

王清臣一首

清臣潁州人

王貽上云天啓初潁川張遠度買田潁南地多桃花林一日攜榼獨

游見耕而歌者聽之所歌皆杜詩也遂呼與語自言王姓清臣名舊有田畋徭役盡委諸族為人傭耕遠度過其廬見舊壁紙背以煤書所作詩其一篇云云

述懷

人生如泛梗飄飄殊無根飲啄得幾許營營晨與昏對
此春日好荷鋤出南原近觀草色敷靜聽鳥語繁有身
貴適意窮達安足論



明詩綜卷七十二